

PROYEUTU/2019-2023 – PODEMOS LLANERA

Dende'l corazón d'Asturies nacen les nuses propuestas, elaboraes depués de munches hores de reflexón y alderique y depués de cuatro años d'esperiencia na institución.

Esti nun ye'l nusu programa electoral, sinón el nusu proyectu para tresformar Llanera nun conceyu más equitativu, inclusivu y ecolóxicu.

Entendemos que toles polítiques que se faen dende les distintes instituciones tienen que tar empobinaes a que les persones que viven en Llanera lo faigan de la meyor manera en tolos aspectos de la so vida, el primeru d'ellos la salú.

Toles acciones de gobiernu inciden na salú de la ciudadanía, l'ayuntamientu ye lo más cercano y la vida la xente tien que tar nel centru d'esas acciones.

Equí vos dexamos les nuses propuestas pa intentar meyorar el conceyu dentro les competencies que tien l'alministración llocal. A partir d'equí, SIEMPRE asegurando mecanismos de participación ciudadana reales pa decidir en cualesquier otru tema.

Lo primero, la vida, ponemos nel centru la vida de les persones y, lo más importante, la so salú.

□ SALÚ

Nun podemos ver la salú como ausencia d'enfermedá sinón como una vida que mereza la pena ser vivida, y pa ello les polítiques llocales tienen que xirar alreduro d'esa vida, no que cinca al mediu ambiente, educación, cultura, deporte, infraestructures, consumu...

- Vamos siguir cola mesa intersectorial de salú del conceyu de la que salieron nesta llexislatura qu'acaba delles iniciatives.

- Plan de salú mental pa Llanera. Na mesa intersectorial constatóse esa necesidá p'actuar en dellos aspectos, básicamente'l cuidáu de les persones cuidadores y l'atención a persones con diversidá psicolóxica y “el respiru” pa los sos familiares.

- Llevar a cabu les xestiones necesaries pa incluyir nel Centru de Salú de Llanera la consulta d'un/a psicólogu/a.

- Destinar financiación abondo a la promoción de la salú nel conceyu y al espardimientu de la información sobro actividaes qu'inciden positivamente nel bienestar.

- Aumentar el presupuestu pal Plan de prevención de drogues y otre adicciones de Llanera.

- Dar continuidá a la Consulta sobre prevención del consumu de drogues.

- Siguir cola dinamización de les siendes saludables na medida na que se vaigan construyendo. Caminar ye saludable y ye gratis, el nusu deber ye facilitar esa posibilidá a toles persones que viven nel conceyu.

- Plan d'ociu inclusivu en collaboración coles árees de cultura, deporte y bienestar.

• Siguir formando parte de la Estratexa Nacional de la salú y prevención del Sistema Nacional de Salú y de la Rede de ciudaes saludables, a les que nos axuntamos nesta llexislatura.

BIENESTAR

• Dende'l nuesu puntu de vista, ye importante faCer una campaña para desestigmatizar los servicios sociales del conceyu y el nuesu oxetivu ye que toles persones que precisen d'una o otra manera ayuda tengan información abondo y nun tengan nengún reparu en dir al departamentu.

• Creemos necesariu priorizar l'atención a persones en riesgu d'esclusión social con midíes que desenvuelvan y refuercen polítiques de formación, de prevención y acompañamientu, y que desanicen práctiques asistencialistes y estigmatizadores.

• La construcción d'un nuevu centru social en Llugo, más céntricu y pal que'l Conceyu yá dispón de proyectu, ye una de les nuses prioridaes, porque l'actual ta un pocu alloñáu pa les persones usuaries de cierta edá.

• Creemos vital el desarrollu de programes en collaboración cola Consejería del tipu del Rompiendo distancias, que tienen como oxetivu evitar l'aislamientu nel mundu rural y la soledá, con servicios como:

- El serviciu de comida a casa, garantizando la correcta alimentación de les persones mayores que viven soles, y evitando accidentes domésticos derivaos de la preparación de la comida.

- Serviciu de peluquería a casa, biblioteca móvil, etc.

CONSUMU

• Apostar pola Oficina Municipal d'Información a les persones consumidores, creada nesta llexislatura que termina, como un nuevu serviciu del Conceyu.

• Facilitar a la ciudadanía del conceyu l'accesu a los Centros de Formación de les persones consumidores.

• Campañes d'información periódiques sobre'l consumu responsable, sobremanera en términos medioambientalmente sostenibles.

• Suministrar a la ciudadanía bolses y botelles reutilizables cola envís d'evitar l'usu innecesariu de plásticos acompañaos de campañes de concienciación sobre la reutilización.

FALEMOS D'INFRAESTRUCTURES!!

•VERTEBRACIÓN DEL TERRITORIU

Creemos mui necesariu vertebrar el territoriu del conceyu y entendemos que'l saneamientu tien de ser l'elementu vertebrador, ye hora de que toles fuerces polítiques que tengan representación municipal lleguen a un alcuerdu sobre esto.

Proponemos un pactu pol saneamientu que suscriban tolos partíos y consiste en que gobierne quien gobierne, añu tres d'añu, un porcentaxe del presupuestu tenga de ser

destináu a expandir la rede de saneamientu. Pa ello proponemos crear una comisión na que tean representaes tamién la comunidá autónoma, (Xunta de saneamientu) y l'estáu (Confederación hidrográfica). Entendemos que ye importante constituyir dicha comisión nel primer añu de la próxima llexislatura y aldericar y afitar el porcentaxe que vamos destinar al saneamientu cada añu.

Per otru llau, y teniendo en cuenta qu'hai persones que trabayen dende les sos cases na zona rural, creemos que ye necesariu realizar la conducción de fibra óptica al mesmu tiempu que s'estiende'l saneamientu. De cara a la posibilidá d'establecer pequeñes empreses nun hai dulda que tener una bona calidá d'internet ye daqué a valorar positivamente.

Y pa rematar con esa vertebración de la que falábamos, proponemos la execución de siendes en toles parroquies, aprovechando les obres de saneamientu, con tolos elementos necesarios a nivel d'accesibilidá, fontes, bancos y arboláu.

Nestos años detectemos la bayura de vecines y vecinos del conceyu que cueyen el so vehículu pa venir al centru a facer usu de les siendes, creemos que tienen derechu a caminar al salir de la so casa y nun tienen por qué coyer el vehículu pa poder caminar.

Los oxetivos d'esta propuesta son meyorar la salú de les persones y tamién la del planeta, asina como facer de la nuesa zona rural un espaciu atractivu pa quedarse.

• ENERXÍA PROPIA

Entendemos que nun hai un plan B pal planeta y tamién somos conscientes de la problemática que supón la eliminación de residuos y la emisión de gases de tou tipu pa la nuesa salú. Amás d'eso hai qu'aporfiar que la cifra que'l Conceyu gasta n'allumáu públicu y enerxía pa tolos llocales municipales ye pergrande.

Precisamos actuar yá, porque'l planeta nun tien un plan B, por eso proponemos actuar en delles fases, la primera ye de manera separada con cada edificiu municipal, pa llegar a conectalos toos nun "Smart grid". Ye un sistema que ta funcionando en munchos llugares.

La última fase consiste nun sistema que nos dexará, per un sitiu, recoyer tola materia orgánico del conceyu, incluyíos los purines, y al mesmu tiempu tresformala n'enerxía llimpio.

Trátase d'un proyectu d'inxeniería pa construyir una planta de biometanización, la basura sotiérrase y al nun tener contactu col aire xenera metanu, que va mover una dinamo pa producir la enerxía abonda p'alimentar el gastu públicu de Llanera.

Tenemos el proyectu, el so preciu rondaría escasamente los cuatro millones d'euros y nun plazu de diez años taría la inversión amortizada.

Esti sistema daría llugar, amás, a la creación de 9 puestos de trabayu directos.

□ TOCANTE A MOVILIDÁ y ACCESIBILIDÁ

Ye innegable que les persones que viven na zona rural de Llanera, qu'ocupa la mayor parte del territoriu, nun tienen accesu a un tresporte públicu de calidá, lo cual niéga-yos

l'accesu a otros servicios nes mesmas condiciones qu'a les demás persones. La nuesa intención ye desanicar esa torga pente medies de:

•SERVICIU MUNICIPAL DE TAXI COMPARTÍU Y A DEMANDA

Ye un serviciu que funciona n'otros llugares y que nun tendría mayor costu que l'actual autobús que circula nun pequeñu trayectu, sicasí:

- Recueye a les persones a la puerta de la so casa y non na parada del autobús, qu'en dellos pueblos pue tar a dos km.

- Afayase'l tresporte a les persones y non les persones al tresporte, siendo “a demanda”

- Amenórgase sensiblemente la buelga de carbonu, porque'l taxi namás que circula cuando se-y necesita y non vacíu.

-Les persones usuaries paguen un costu simbólicu (un euru, por exemplu) que se deduz del costu del serviciu, non como nel casu del autobús, que ye más caru y amás va parar a los bolsos de la empresa.

- El dineru queda en Llanera y repercute positivamente nos sos habitantes.

- L'horariu pue ser más estensu nel tiempu, compatible con horarios llaborales.

- El tresporte dende Posada a Llugo facilita l'accesu al tren pa comunicase con Uviéu, Xixón, Avilés, Llangréu y Mieres.

•CARRILES BICI

- Hasta los polígonos industriales esistentes nel conceyu, pa poder movese al trabayu de manera sostenible pero segura.

- A lo llargo de toles siendes que se vaigan faciendo al mesmu tiempu que'l saneamientu.

•SISTEMA DE CONTROL DE VELOCIDÁ NES TRAVESÍES DE POSADA, LLUGO Y SAN CUCAO

Nun pue convertise en deporte de riesgu cruciar ciertos pasos de peatonos nos que'l peligrosu ta claramente contratáu. Amás de garantizar la seguridá que precisen los peatones, ye importante amenorgar la contaminación acústico y ambiental.

•ACCESIBILIDÁ N'EDIFICIOS PÚBLICOS

Ye importante l'estudiu de l'accesibilidá a la planta primera de la Casa Conceyu, en función de la posibilidá y preciu d'instalación d'un ascensor, esi cambéu ye urxente, y si non, va haber que celebrar los Plenos n'otru llugar. Aun así hai qu'empezar a valorar la necesidá de construcción d'un nuevu edificiu porque l'esistente ta obsoleto tamién n'otros aspectos.

•El restu d'edificios, en función de la so prioridá d'usu, hai qu'adautalos a lo llargo de la llexislatura, elaborando un proyectu qu'estableza unes prioridaes d'actuación.

- Siguir cola Comisión de barreres arquitectóniques implicando a los distintos actores. Ye vital tresversalizar la eliminación de barreres.

• **ACCESU A LA INFORMACIÓN**

Ye necesariu llevar internet a los Centros sociales de tol conceyu, pa facer realidá el derechu de les persones a la información. Tamién nel mediu rural.

□ **SERVICIOS**

- De la mesma manera que va cuatro años, consideramos esencial la vuelta a la xestión pública de los servicios municipales. Desgraciadamente nesti momentu solo vemos posible facelo col Serviciu de Parques y xardinos.

- Vamos vixilar de mui cerca'l cumplimientu de les clausules contractuales en caúnu de los servicios privatizaos nel conceyu.

- Creemos importante y absolutamente necesaria la llimpieza de los soportales polo menos dos vegaes al añu, siempres acordies coles comunidaes de propietarios. Al ser esti un espaciu priváu d'usu públicu, topeten los intereses, normativos y obligaciones de manera que la resultancia ye una falta de llimpieza y salubridá importante.

- Vamos revisar los contratos vixentes na medida de lo posible de manera que les empreses nun utilicen glifosato nin otra sustancia perxudicial pal medioambiente nos sos trabayos.

□ **MEDIU AMBIENTE**

Creemos importante la creación d'un área de sostenibilidá y ecoloxía nel Conceyu de Llanera. Ye hora de que les alministraciones nos involucremos directamente na protección del Planeta y de la vida que la habita.

PLAN DE REFORESTACIÓN DEL CONCEYU

Ye'l nuesu oxetivu llantar muchos árboles, por delles razones, la principal d'elles ye que nos importa la salú de les persones, n'especial la de les que viven en Llanera.

Los árboles apurren aire llimpiu y frescu, y solombra cuando apreta'l calor, son una protección natural contra la contaminación. Nes zones urbanes, los árboles, amás de dar guapura a les cais apurren bienestar físicu y mental a los sos habitantes.

Por eso proponemos dellos proyectos dientro d'un Plan de reforestación del conceyu de Llanera, dalgunos d'ellos tán realizándose con gran ésitu n'otros llugares, como'l "Bosque generacional", nel que cada vez que naz una persona, los sos proxenitores llanten un árbol.

- Dende la participación ciudadana y de forma collaborativa y nun entornu lúdicu, puen camudase eses zones qu'esisten en tolos pueblos que son inservibles pal cultivu:

turries, terrempenes, marxés de carreteres, etc; estropien el paisaxe y, de cara a visitantes, conviden a pasar de llargu en llugar d'a quedase. Nes zones urbanes tamién existen esos pequeños espacios llenos de maleza que podemos tresformar, afitando unos díes de llantadera al añu, que terminen con una merienda.

- Ye importante desenvolver proyectos que sensibilicen nes edaes tempranes y tener en cuenta que los árboles son una forma bien barata d'actuar positivamente na salú de les persones.

- Creación d'una llínea de sovenciones destinada al plantíu d'especies autóctones nos terrenos comunales per parte de les persones llevadores.

- Creación d'un programa de plantíu d'especies autóctones en terrenos comunales, afayaes al terrén. Esta actividá ye de tipu comuñal, lo que n'Asturies se denomina Sestaferia, trátase de facer de la ecoloxía y la sostenibilidá daqué lúdicu.

Per otru llau, n'otros Conceyos de la nuesa redolada aprobóse la prohibición del usu de sustancias como'l glifosato poles empreses que trabayen pal Conceyu. Creemos importante dar esti pasu por delles razones, la primera d'elles la salú de la ciudadanía y, tamién, la salú d'otros elementos qu'inflúin nella, como les abeyes.

- Nesi sentíu creemos importante facer cursos y campañes de sensibilización sobre les demoledores consecuencies del usu de los disruptores endocrinos como'l glifosato, tendiendo la mano a otres alternativas más saludables pa toos.

- Dende'l Conceyu pue actuase nel ecosistema dende otres maneres, como la inclusión de cláusules medioambientales en tolos tipos de contratos con empreses.

POTENCIACIÓN DE LA ECONOMÍA CIRCULAR

- Elaborar un programa de prevención y reutilización, pa fomentar la reutilización y l'arreglu.

- Xestionar los residuos promoviendo la separación n'orixe y recoyendo la materia orgánico, biomasa y residuos ganaderos pa xenerar enerxía y convertilo en compost.

- Optimizar les redes de suministru y saneamientu, evitando les perdes innecesaries d'agua

- Promover la eficiencia y l'aforru enerxéticu nel parque inmobiliariu, per aciu una llínea d'ayudes al respetu. Empezar polos edificios públicos.

- Fomentar el consumu responsable y embrivir el desperdiciu alimentariu.

- Compra pública sostenible ya innovadora.

- Motivación, sensibilización ya implicación de los actores presentes nel territoriu

□ DIVERSIDÁ YA IGUALDÁ

La diversidá ye un rasgu característicu de les sociedaes actuales y constitúi un retu importante pa la vida en democracia. Anque esti conceutu fálanos en primer llugar a la diversidá cultural, d'orixe, llingües y relixones, toma otros aspeutos, como la diversidá funcional, mental, cognitiva, por edá, xéneru, o orientación sexual.

Nesti sentíu, la solidaridá y el respetu son valores necesarios pa la convivencia.

Nuna sociedad multicultural y diversa como l'actual, les polítiques públicae nun tienen que ser unidimensionales, sinón tener en cuenta que los bienes que distribúin (salú, educación, seguridá, cultura, etc.) tienen como receptor a un públicu cada vez más heteroxéneu. Facer política social güei rique que les persones que tomen les decisiones polítiques y el cuerpu técticu de l'alministración tean formaos na diversidá.

Tenemos que ser conscientes de que formamos parte d'un procesu de cambéu, que ye'l pasu de la visión monocultural de la sociedad a la visión de la sociedad diversa. Y cada vez más les sociedaes son más multiculturales y diverses.

Esti procesu tien que llevanos a ver que la diversidá seya vista como positiva. Esto ye fundamental, ye lo que tenemos de facer y ye lo que vamos facer.

Por eso proponemos dellos planes d'acción dende la política llocal, porque querer resolver problemes de desigualdá social y económica ensin cuntar con estes realidaes pue xenerar más separtación.

- Plan pa la diversidá sexual y de xéneru. Ríquese un cambéu institucional pa entamar, la perspectiva de xéneru y d'identidá sexual tamién son necesaries nel trabayu. Los oxetivos son la Información, acompañamientu y empoderamientu de les persones LGTBI+ y de les muyeres, la coeducación dende la escuela de 0 a 3 años, la educación na non violencia y la visibilización nel deporte y na cultura.

- Contratación d'una persona axente d'igualdá p'apurir una visión de xéneru a les decisiones polítiques y técniques.

- Proyeutu d'acompañamientu psicolóxicu pa les muyeres que denuncien violencia de xéneru.

- Plan d'ociu inclusivu, onde garantizamos a cualquier persona, seya como seya la so condición, l'accesu al ociu nel conceyu, en materia cultural o deportiva y “el respiru” pa les persones cuidadores.

□ **EMPLEGU**

El Conceyu nun tien de crear emplegu, sinón fomentar la so creación, qu'unque puea sonar igual, nun ye lo mesmo.

L'Alministración llocal tien que tener toles necesidaes cubiertes tocante a personal, d'ehí vien la lentitú de los procesos, ente otres coses, pero'l Conceyu nun pue funcionar como una “Axencia de Colocación”.

Y ¿entós? Entós hai dellos medios pa fomentar la creación d'emplegu. El mesmu dineru pue invertise de distintes maneres pa llograr el mesmu fin, la creación d'empléu.

Creemos importante la organización dende'l Conceyu d'itinerarios formativos pa la creación de cooperatives y empreses de tipu social que puean acceder a los contratos públicos.

L'establecimientu de cláusules sociales na contratación del Conceyu va apurrir trabayu a les empreses de tipu social.

Respecto al plan d'empléu llocal, destinando'l so importe a sovencionar pymes y autónomos pola contratación de persones del conceyu nun añu, consiguiríamos:

- Introducir a les persones nel circuitu llaboral en llugar de contratales pa facer xeres del Conceyu, (bordiando la llegalidá y dando llugar a denuncies ya indemnizaciones).
- Ayudar a les pymes y los autónomos a poder contratar a persones pa trabayar.
- Fomentar la creación d'ente 30 y 50 puestos de trabayu al añu en llugar de 10 o 12 que suponen un plan d'emplegu.

El Conceyu había d'asegurase de que les empreses sovencionaes cumplen cola llexislación en materia de calidá d'emplegu, de lo contrario asocedería como con cualesquier otra sovención.

• Creemos na ecoloxía como motor económicu de conceyu no tocante a la xeneración d'una marca llanera destín ecolóxicu.

• Va xenerase una rede ecolóxica que consiga garantizar una demanda n'hostelería, comedores escolares, cátering a persones mayores que vivan soles y comerciu llocal. D'esa manera va ser viable la creación de puestos de trabayu nel sector que puean xenerar la ufierta necesaria.

• Vamos crear una llínea de sovenciones al establecimientu d'autónomos y microempresas de tipu social que s'establezan na zona rural del conceyu y opten por esti tipu de producción y de tresformamientu nel mesmu sentíu.

☐ TRESPARENCIA Y PARTICIPACIÓN

• Cumplimientu de la ordenanza de participación ciudadana que llevamos al plenu nesta llexislatura que termina, por parte de TOLOS axentes implicaos.

• Contratación del personal necesario pa facer una repartida efectiva de la información física per toles parroquies, nel sentíu que-y dimos a la campaña “nel centru, la to vida”.

• Contratación del personal necesario pa tener actualizada la información na páxina web.

• Siguir les asamblees nes parroquies en TOLOS años de la llexislatura.

• Modernizar la imaxe corporativa del Conceyu.

• Creación d'una ordenanza de convivencia na que se regulen eses coses pequeñes que faen que n'ocasiones les persones tengan enfrentamientos, ruios, golores, etc.

**PODEMOS
LLANERA**

□ DEPORTES

• Creemos que'l deporte debe de ser una suma de voluntades, de propuestas y de vivencias compartidas, por eso vamos a crear un Conceyu Municipal de Deportes, nel que tolos Clubes y Asociaciones deportives tengan representación pa poner en marcha un nuevu modelu nel conceyu.

• Les funciones d'esi conceyu seríen, ente otres, la promoción de la práctica del deporte escolar, aficionáu y popular; l'atención especial a sectores menos favorecidos tradicionalmente, muyer, colectivu LGTBI, tercer edá, persones con dalguna discapacidá y l'Alministración de les instalaciones deportives de propiedá municipal d'una manera xusta ya igualitaria.

• Ye necesariu construyir ente toos/es un Plan de deporte escolar, empezando por actividaes de “descubrimientu” de los distintos Clubes pa que l'alumnáu tenga la opción de probar hasta atopar daqué que-y guste.

• Queremos potenciar l'usu de les siendes, siguiendo col llabor de dinamización empezada na llexislatura que remata y siguiendo según se vaigan executando les siendes previstes.

• La nueva intención ye intervenir en delles instalaciones col enfotu de que tamién seyan aprovechables pa usu deportivu. Ye l'exemplu del recintu ferial, nel que puen ponese vestuarios y duches, y nel qu'amás, el Conceyu ta en procesu de compra d'un terrén que pensamos ideal pa construyir un campu de rugby. Nel núcleu deportivu de Llugo consideramos viable la construcción d'un Pumptrack, que conxuntamente con Santu Firme puen dinamizar el Conceyu en gran midida.

• Lo que pensamos pa Santu Firme ye una intervención global de manera que se señalicen les distintes rutes y que se puean simultanear dellos deportes en condiciones de seguridá. Pue faese una ruta para BTT, senderismu y cualesquier otru deporte que puea realizase en condiciones de sostenibilidad y harmonía cola naturaleza.

• Proponemos tamién la construcción d'una instalación de work out y parkour por ser daqué positivu, novedosu y atractivu como deporte, y creemos que la redolada del IES ye'l sitiu ideal.

• Tamién tenemos un proyectu pal actual Centru Social de Llugo, que vamos asitiar nun llugar más céntricu, cola tresformación del complexu nuna Casa d'alcuentros, pa facilitar y allugar los intercambios ente clubes deportivos.

Al traviés del deporte podemos construyir un conceyu activu, saludable y mui visitáu.

• Cambéu de pista nel polideportivu de Llugo pa dar posibilidá a la práctica del patinaxe y del voley.

□ EDUCACIÓN Y CULTURA

• Siguiamos apostando pola xeneralización de les escoles de 0-3 años y sofítamos les propuestas programátiques de competencia autónoma pal primer ciclu d'infantil. El

**PODEMOS
LLANERA**

serviciu tien de depender diréctamente de la Consejería d'Educación y ufiertase de manera gratuita.

- Vamos potenciar un programa de coeducación na escuela de 0 a 3.
- Tenemos l'oxetivu de xestionar el comedor de los centros educativos diréctamente, contratando'l serviciu a empresas cooperatives o d'otru tipu social y verificando con una periodicidá mensual la calidá, cantidá y el serviciu.
- Vamos crear espacios llibres de bulling nos centros escolares, efectuando campañes contra la xenofobia, racismu, homofobia y violencia contra les muyeres.
- Creemos importante l'alfabetización dixital de la población, n'especial a partir d'una edá y na zona rural.
- Utilizar el recintu ferial de Ables pa la organización de conciertos de too tipu, campamentos de branu, mercaos tradicionales y ecolóxicos y cualesquier usu que la población del Conceyu demande, faciendo sostenible'l caltenimientu del recintu, amenorgando los costos de dichu caltenimientu tolo posible y dinamizando'l so usu polos distintos colectivos.
- Abrir los comedores escolares los dolce meses si ye necesariu por motivos de necesidá.
- Programar campamentos pa conciliación nos díes, selmanes o meses que seyan necesarios, de manera participativa y en collaboración con AMPAS y persones usuaries, de manera que'l campamentu respunda a les necesidaes reales de proxenitores y alumnáu.
- Facer campañes que traten d'informar, asesorar ya implicar a les distintes asociaciones de Llanera cola llingua asturiana, llevando l'usu normal del asturianu a los distintos campos que cubre l'asociacionismu: entidaes deportives, vecinales, gastronómiques, festives, etc.

Coordinar acciones conxuntes que faigan posible incluír l'asturianu na ufierta cultural del Conceyu de Llanera.

- Diseñar una ufierta cultural qu'incluya l'asturianu en películes, obres de teatru, actuaciones musicales...
- Celebrar dientro del calendariu cultural del Conceyu'l Día de Les Lletres Asturianes
- Concenciar a la sociedá de la importancia crucial de la tresmisión interxeneracional del asturianu.
- Crear campañes atractives y actuales pa implicar a la mocedá - que representa'l futuru de la llingua- nel procesu de normalización llingüística.

•Estos últimos años fueron problemáticos no tocante a la rellación de la Comunidá educativa de la Escuela Municipal de Música col Conceyu. La nuesa opinión ye que de manera conxunta soluciónense los problemes que se creen per separáu. Apostamos, por tanto, porque esta Escuela de Música tenga un status de Centru Educativu en tolos sentíos, y qu'empiece por aprobase nel plenu un reglamentu de consensu y que derive nuna participación efectiva de toles partes na xestión de la Escuela na forma Conceyu Escolar

Per otru llau, creemos un erru'l fechu de quitar delles asignatures como la de música tradicional, asignatura pola qu'apostamos ensin duldes.

MOCEDÁ

• Paernos mui importante xenerar contestos de participación pa conocer y entender les esmoliciones ya intereses de la mocedá. Por eso entendemos necesaria la creación d'otros dos espacios como'l de Posada, en Llugo y en Pruvia.

• Proponemos la dinamización de los espacios nuevos por una empresa de tipu social, que realice una programación de cine fórum, talleres, salíes pel conceyu y toa triba d'actividaes basaes siempre en:

- L'ociu saludable.

- L'ociu inclusivu, alternativu y constructivu.

- L'ociu que se venceye al territoriu y a la ecoloxía

• L'oxetivu final ye que les persones moces tiendan a autoxestionarse ente ellos y los sos espacios, fuxendo d'actividaes consumistes y del adultocentrismu.

• Proponemos la construcción d'un parque urbanu de parkour y workout, un deporte non mui practicáu n'Asturies pero novedosu.

BIENESTAR ANIMAL

Queremos que Llanera seya un llugar prestosu y amigable para toda triba de persones y colectivos, pero tamién pa los nuestos amigos peludos. Nesti sentíu ye innegable la carencia qu'esiste nesti conceyu, onde los animales abandonaos nun disponen d'unes instalaciones onde ser recoyíos y curiaos mientras se-yos busca un llar onde puean tener una vida digna y feliz.

Anguaño'l procedimientu que se sigue nel casu d'atopar un perru abandonáu o perdíu ye llamar a la policía llocal, que comprueben si lleva microchip y en casu contrariu, contacten con una entidá privada que pasa a recoyelu, lo que supón un eleváu gastu pa les arques municipales. Y nel casu de los gatos diréctamente nun se lleva a cabu nenguna acción de rescate, nin siquiera d'esterilización pa controlar a la población felina que vive na cai.

Dende Podemos Llanera proponemos la creación d'un albergue de titularidá municipal que garantice'l so bienestar y onde se-yos pueda ufiertar una segunda oportunidá, impulsando les adopciones y realizando campañes de concienciación en contra del maltratu y l'abandonu animal, d'implantación de microchip, d'esterilización, y onde la eutanasia se considere namás como última opción en casos d'enfermedá o firies irreversibles.

Les instalaciones tendrán d'afayase pa cubrir les necesidaes de los perros y gatos agospiaos no tocante a alimentación, hixene, seguridá, salú y espaciu pa ociu y socialización.

**PODEMOS
LLANERA**

Igualmente tendrán de tar afayaes pal personal del albergue y persones voluntaries o visitantes, pa que puea accedese con comodidá y seguridá. Tamién tendrá de cuntar con capacidá p'almacenar el material necesariu pal funcionamientu de les instalaciones, y cola documentación relativa a los animales acoyíos y a les adopciones que se lleven a cabu, permitiendo un siguimientu efectivu de les actividaes que se realicen.

Vemos necesaria la creación d'un parque canín en Posada y la regulación d'un espaciu periurbanu onde les mascotas puean soltase pa correr llibremente.

Per otru llau, creemos fundamental l'aplicación del protocolu CES (captura, esterilización y suelta) para gatos de la cai, medida aprobada en Plenu na llexislatura 2011-2015 y qu'entá nun s'aplicó.

Amás, queremos impulsar la ordenanza municipal referida a la tenencia d'animales, que data de 2005. Dende entós la sociedá evolucionó enforma n'ese sentíu y creemos que ye importante reflexar nesa ordenanza les esmoliciones que la mayoría de persones tenemos al respective de los derechos de los nuestos compañeros de vida. A lo último, vemos necesariu proclamar Llanera llibre de circos qu'utilicen animales, pos trátase d'una forma de maltratu y esplotación totalmente indigna.

□ PATRIMONIU

- Llevar a cabu un inventariu de los bienes muebles ya inmuebles pertenecientes al patrimoniu históricu-artísticu y etnográficu del conceyu.

- Establecer midíes concretes pal so caltenimientu y restauración, lo mesmo que de sovención de les mesmes p'aquellos bienes de titularidá privada que lo soliciten.

-Restaurar y poner en valor aquellos bienes que seyan de titularidá pública.

- Rematar el procesu de recuperación y oficialización de la toponimia tradicional entamáu yá pol Conceyu de Llanera y, normalizar l'usu de los topónimos de los nuestos llugares una vegada que tean espublizaos nel BOPA correspondiente. Acabar colos prexucios llingüísticos qu'esisten na nuesa sociedá al traviés de la implicación y el compromisu de la función públicu.

- Facer campañes de promoción del asturianu nos ámbitos d'interacción social primaria: comerciu, hostelería, centros escolares...

- Informar activamente de los drechos que la ciudadanía de Llanera tien en cuestión llingüística.

- Facer una campaña de normalización toponímica pa dar vitalidá y prestixu a los topónimos que se vienen usando tradicionalmente de forma oral.

- Siguir cola programación de conciertos de música n'asturianu tolos años con ocasión de la Selmana Les Lletres Asturianas.

- Promover la llingua asturiana na educación al traviés de campañes n'escuelas ya institutos.

- Ufiertar cursos d'asturianu dientro de les actividaes formatives del Conceyu.

**PODEMOS
LLANERA**

□ MEMORIA HISTÓRICA

Decatámonos de que les instituciones tienen una delda pendiente coles víctimes de la Guerra Civil y la Dictadura, y por eso proponemos midíes empobinaes al so reconocimientu, como facer estudios alrodiu la represión nel conceyu, trabayar con asociaciones de familiares de víctimes o finxar con propiedá les foxaques que s'atopen per tol nuestro territorio.



**PODEMOS
LLANERA**

en kol
vora
jó

**PODEMOS
LLANERA**